

ՎՐԱՅ-ԱՔԵԱԶԱԿԱՆ ՀԱԿԱՍԱՐՏՈՒԹՅՈՒՆԸ ԵՎ ՀԱՅԿԱԿԱՆ ԳՈՐԾՈՆԸ

Գրիգոր Արշակյան, Արման Եղիազարյան

Արխագիայի հայ համայնքի պատմությունից

Արխագիայում հայերը բնակվել են 17-րդ դարի վերջերից, երբ Օսմանյան կայսրությունը բռնի կերպով սկսեց իսլամացնել հայերին: Դրա հետևանքով Արխագիա գաղթեցին ավելի քան 100 հազար հայեր: Արխագիայի հայերի մոտ 95%-ը համշենահայեր են, որոնք եկել են Թուրքիայի մերձսևծովյան Օրդու, Ջենիկ, Տրապիզոն և այլ բնակավայրերից: Համշենահայերը Սև ծովի հարավային ռուսական ափերում սկսել են բնակություն հաստատել 1870-ական թվականներից: Համշենահայերի առավել մեծ հոսք է սկսվել 1877-1878թթ. ռուս-թուրքական պատերազմից հետո: 1915-1923թթ. Հայոց ցեղասպանության ժամանակ համշենահայերի զգալի մասը կոտորվել է, իսկ փրկվածներն ապաստան են գտել Արխագիայում և Սև ծովի ռուսական ափերում [1, շ. 195]:

Խորհրդային տարիներին, ըստ պաշտոնական տվյալների, Արխագիայում ապրում էր 76 հազ. 541 հայ (239.872 վրացի, 93.267 աբխազ, 74.914 ռուս): 1992-1993թթ. վրաց-աբխազական պատերազմի ժամանակ, ինչպես նաև նրա ավարտից հետո զգալի թվով հայեր հեռացան Արխագիայից, և այժմ մոտավոր տվյալներով այնտեղ մնացել է 60-70 հազ. հայ¹:

Արխագիայի ծովափի երկայնքով սփռված են հայկական բնակավայրեր, որտեղ խոսում են հայերեն, իսկ հայ երեխաների մի մասը հաճախում է հայկական դպրոց: Արխագիայում հայերը հիմնականում զբաղվում են գյուղատնտեսությամբ, իսկ հարավարևելյան մասում՝ նաև առողջարանային բիզնեսով:

Արխագիայի 7 շրջաններից 6-ում հայկական բնակչություն կա, որոնցից երկուսում՝ Լաբրայում և Հայկական Աթարայում, հայերը մեծամասնություն

¹ Պատմական գիտությունների թեկնածու, ՀՀ սփյուռքի նախարարության աշխատակազմի հայրենադարձության և հետազոտությունների վարչության հետազոտությունների բաժնի պետ:

“Պատմական գիտությունների թեկնածու, ՀՀ սփյուռքի նախարարության աշխատակազմի հայրենադարձության և հետազոտությունների վարչության պետ:

¹ *Якубян В.*, Турция пошла в Абхазию со своей "правдой" об армянах,

<http://www.hamshen.org/forum/viewtopic.php?f=9&t=200>.

են: 1890թ. հայերի կողմից հիմնադրված Լաբրա գյուղը գտնվում է Սուխումից արևմուտք Օչամչիրայի շրջանում: Լաբրան պատերազմի ժամանակ ամենից շատ վնասված հայկական գյուղերից է: Լաբրայում են բնակվում արխազական պատերազմի երեք հերոսներ: Մինչև պատերազմն այստեղ բնակվել է 650 ընտանիք, այժմ մնացել է մոտ 150-ը: Օչամչիրայի մյուս հայկական գյուղում՝ Հայկական Աթաբայում, 800 տնտեսություններից միայն 50-ն է մնացել: Մինչ պատերազմը Լաբրայի գլխավոր եկամուտի աղբյուրը ծխախոտն է եղել¹:

Արխազիայի ամենահին բնակավայրերից է Մցարա (Մեծ Արա) գյուղը, որի 130-ամյակը նշվեց 2009թ. սեպտեմբերին: Գյուղն Արխազիայում համաշխարհային կողմից հիմնադրված առաջին բնակավայրերից է:

Արխազիայի հայ համայնքը և վրաց ազգայնական շարժումը

Արխազիայի հասարակական, քաղաքական և տնտեսական կյանքում երկրի հայ համայնքի դերակատարությունն ու կշիռը հստակ պատկերացնելու համար կարևոր նշանակություն ունի 1992-1993թթ. վրաց-արխազական պատերազմում արխազահայերի մասնակցության, դրա հիմնական դրոպապատճառների և նշանակության ուսումնասիրությունը:

1980-ական թթ. Արխազիայի հայ համայնքում գործում էին երկու խոշոր հայկական կազմակերպություններ՝ Սուխումի «Կռունկ»-ը, Գագրայի «Մաշտոց»-ը, որոնք ստեղծվել էին որպես մշակութային-բարեգործական կազմակերպություններ, սակայն նրանց միջև կային նաև որոշակի տարբերություններ: Այդ տարբերություններն առավել նկատելի էին դառնում այն ժամանակ, երբ առավել սրվում էին հարաբերությունները Վրացական ԽՍՀ-ի և Արխազական ԻԽՍՀ-ի միջև:

Ալբերտ Թովալյանի ղեկավարությամբ գործող Սուխումի հայկական համայնքն ակտիվորեն մասնակցում էր Արխազիայի քաղաքական կյանքին: Մասնավորապես Սուխումի հայ համայնքը ներկայացնող պատգամավորներ կային հանրապետության Գերագույն խորհրդում: Սուխումի հայկական համայնքը նկատելի քաղաքական ազդեցություն ուներ նաև Հայաստանի բազմաթիվ քաղաքական ուժերի հետ իր ղեկավարության սերտ կապերի շնորհիվ: Շրջափակման և պատերազմի մեջ գտնվող Հայաստանը՝ ի դեմս իր պաշտոնական ղեկավարության, դժկամությամբ էր կապեր հաստատում քաղաքականացված «Կռունկ» մշակութային-բարեգործական ընկերության հետ՝ քաջ գիտակցելով, որ այդ շփումները բարդացնում են երկրի առանց այդ էլ դժվարին իրավիճակը տարածաշրջանում: Հայաստանի իշխանությունների փոխարեն, Սուխումի հայկական համայնքը հայտնվեց ազգայնական ուղղվածություն ունեցող հայ քաղաքական կուսակցության սևեռուն ուշադրության ներքո:

¹ Vahan Ishkhanyan, ABKHAZIA ARMENIANS: HOLDING A HOME IN AN UNSTABLE TERRITORY, 11.01.2004, http://www.agbu.org/publications/article.asp?A_ID=159.

Ի տարբերություն Սուխումի համայնքի՝ Արսեն Չաքրյանի ղեկավարությամբ գործող Գագրայի հայկական համայնքը հեռու էր մնում Արխագիայի քաղաքական կյանքին մասնակցելուց: Գագրայի հայկական համայնքն առավել մշակութային-բարեգործական ուղղվածության ընկերություն էր, ակտիվ և բացահայտ կերպով համագործակցում էր Հայաստանի մշակույթի նախարարության հետ և զբաղվում բարեգործական գործունեությամբ:

Գագրայի համայնքը, որպես առավել բազմաքանակ և ռազմավարական առումով առավել նշանակալից համայնք, գտնվում էր հանրապետության ինչպես վրացական, այնպես էլ արխագական մասի մշտական ճնշման ներքո: Եթե «Կռունկ»-ի հետ կապված ամեն ինչ պարզ էր և այն հստակորեն նշում էր իր քաղաքական համակրանքը հոգուտ Գերագույն խորհրդի արխագական խմբակցության, ապա «Մաշտոց»-ը ակտիվորեն դիմագրավում էր իրեն քաղաքականության մեջ ներքաշելու բոլոր փորձերին: Այդ դիմադրությունն առաջ էր բերում Արխագիայի բոլոր քաղաքական ուժերի դժգոհությունը, քանի որ Գագրայի շրջանում բնակվող ավելի քան 10 հազար հայերը բավական ազդեցիկ ուժ էին և կարող էին օգտագործվել նրանց կողմից¹:

Վրացիների և արխագների միջև բախումները, որոնք տեղի ունեցան 1989թ., այնուամենայնիվ, չբացահայտեցին, թե ում օգտին են հանդես գալիս Արխագիայի հայերը: Ավելին, արխագները չէին վստահում Գագրայի հայերին, քանի որ այդ դեպքերից քիչ առաջ նրանք վրացիների հետ կանգնել էին թուրք-մեխեթների շարասյան ճանապարհին, որը փորձում էր Ադլերով անցնել Վրաստան: 1992թ. Արխագիայում արխագների և վրացիների հակամարտությունը հասավ գագաթնակետին: Վրաց ազգայնականները հանդես էին գալիս առավել ագրեսիվ կերպով, և զգացվում էր, որ զինված հակամարտությունն անխուսափելի է: Ե՛վ վրացիները, և՛ արխագները ստեղծեցին քաղաքական շարժումներ, որոնց ղեկավարության կազմի մեջ մտնում էին ազդեցիկ հայերի:

Վրացիները չէին վստահում հայերին, քանի որ Սուխումի «Կռունկ»-ը համառորեն պաշտպանում էր Հայկական սփյուռքի շահերն Արխագիայի Գերագույն խորհրդում՝ առավել հաճախ անցնելով արխագական խմբակցության կողմը: Արխագիայի վրաց ազգայնականները՝ Թամազ Նոդարեյշվիլու ղեկավարությամբ, հասկանալով, որ հայերն ազդեցիկ ուժ են և ի վիճակի են փոխել քաղաքական ուժերի հարաբերակցությունը հանրապետությունում, հանդես եկան կոշտ ազգայնական կարգախոսներով: Այդ ելույթների նպատակը հայ, ինչպես նաև ռուս բնակչության վրա ճնշում գործադրելն էր, որ-

¹ Амшенци Лаврентий, АРМЯНСКИЙ АКЦЕНТ ГРУЗИНО-АБХАЗСКОГО КОНФЛИКТА, Ноябрь 2002, <http://www.abkhazia.narod.ru/lavrik-nov.htm>.

պեսզի վերջիններին ստիպեն հրաժարվել արխագներին աջակցելուց¹: Մյանալիքն ազդեց. որոշ հայ գործիչներ հրաժարվեցին աշխատել համայնքներում: Այդ ժամանակ կտրուկ սրվել էր իրադրությունը նաև Լեռնային Ղարաբաղում: Հայկական սփյուռքը մարտնչող հայրենակիցներին օգնելու նպատակով կազմակերպեց միջոցների հավաք և օգնություն ցուցաբերեց՝ Լեռնային Ղարաբաղ ուղարկելով ռազմական բեռների խմբաքանակ: Բացի այդ, Արխագիայից Ղարաբաղ մեկնեցին նաև կամավորներ տեղի հայ բնակչությունից:

Այդ ֆոնին Վրաստանում շարունակում էր ուժգնանալ վրաց ազգայնական շարժումը: «Վրաստանը՝ վրացիներին» կարգախոսները հնչում էին առավել հաճախ, որի հետևանքով սրվում էին վրաց-արխագական հարաբերությունները: «Մաշտոց» հայկական ընկերության նախկին ղեկավարների կարծիքով՝ հենց վրաց ազգայնական շարժման ծավալումը դարձավ իրենց հիմնական խնդիրը: Գազրայի հայկական համայնքը գաղտնի սկսեց իր կազմակերպչական կառույցի վերադասավորումը: Համայնքի կառուցվածքը վերածվեց ճկուն մեխանիզմի: Գազրայի շրջանում (իսկ Գազրա քաղաքում յուրաքանչյուր փողոցում, որտեղ հոծ բնակվում էր հայ բնակչությունը) նշանակվեց ավագ (հայերեն՝ «մեծ»): Յուրաքանչյուր ավագին կցվում էր տղամարդկանց խումբ, որոնց խնդիրն էր ազդանշանի դեպքում հավաքվել նշանակված վայրում: Միևնույն ժամանակ, «Մաշտոց»-ը շարունակում էր չեզոքություն պահպանել և ուշադիր հետևել Արխագիայում տեղի ունեցող իրադարձությունների զարգացմանը²:

Վրաց-արխագական հակամարտության խորացումը և այդ հակամարտությանն արխագահայերի մասնակցության հիմնական դրդապատճառները

Վրաց-արխագական հակամարտության խորացմանը զուգահեռ, Արխագիայի հայ համայնքում գործող խոշոր հայկական կառույցների միջև տեղի ունեցան առաջին բախումները, որոնց հիմնական դրդապատճառը վրաց-արխագական հակամարտությունում արխագահայության մասնակցել-չմասնակցելու հարցն էր: Արխագական կողմին ակտիվորեն աջակցող «Կռունկ»-ը փորձեց իրեն ենթարկել «Մաշտոց»-ը: Գազրայում տեղի ունեցած համատեղ ժողովում բախում տեղի ունեցավ «Կռունկ»-ի և «Մաշտոց»-ի ներկայացուցիչների միջև: Ի պատասխան «Կռունկ»-ի ներկայացուցչի՝ միասնական համաձայնեցված քաղաքականություն վարելու պահանջին՝ «Մաշտոց»-ի ներկայացուցիչը հայտարարեց, որ վրաց-արխագական հակամարտությանը Գազրայի համայնքը

¹ Լույն տեղում:

² Լույն տեղում:

չի մասնակցի, և եթե նույնիսկ հարկադրված լինի մասնակցել, ապա, բացի հայերի շահերից, ոչ մեկի շահերը չի պաշտպանի¹: Այդ պահից երկու համայնքների միջև խոր անդունդ ձևավորվեց:

1992թ. օգոստոսի 14-ին վրացական զորքերը մտան Աբխազիայի տարածք, և սկսվեց պատերազմը [2, c. 16]: Առաջին իսկ օրերից Սուխումի համայնքի ղեկավարությունն աջակցեց արխազական կողմին, որի հետևանքով Վլադիսլավ Արձինբայի գլխավորությամբ երկրի ղեկավարության հետ եվակուացվեց Գուդաուտա: Չնայած «Կռունկ»-ի ղեկավար Ալբերտ Թոփայանի կոչին, Սուխումի և մերձակա շրջանների հայ բնակչությունը զանգվածային մասնակցություն չցուցաբերեց վրացական ագրեսիայի դեմ կազմակերպված դիմադրությանը: «Կռունկ»-ը կազմալուծվեց, և համայնքի անդամները սկսեցին ինքնուրույն լուծել ծագած խնդիրները, Ռուսաստան և Հայաստան տեղափոխել իրենց ընտանիքներին, բարեկամներին, ունեցվածքը:

Նույն խնդիրն առկա էր նաև Գագրայում: Մակայն Գագրայի շրջանում հստակորեն աշխատեց համայնքի ճկուն մեխանիզմը: Տղամարդկանց մեծ մասը մոբիլիզացվեց և լիակատար պատրաստ վիճակում էր: Հարկ է նշել, որ թեև հայերը զենք չունեին, տղամարդիկ անընդհատ հետևում էին իրավիճակին, և ամբողջ տեղեկատվությունն ուղղվում էր հատուկ ստեղծված հայկական կենտրոն:

Գագրայի շրջանի մեծ մասի՝ վրացական վարչակազմի վերահսկողության տակ հայտնվելուց հետո, հայ համայնքի հետ կապված լուրջ խնդիրներ առաջացան: Քաղաք մտած վրացական զորքերը սկսեցին թալանը: Սկզբում կողոպուտի ենթարկվեցին արխագների լքված տները, իսկ հետո արդեն քաղաքում գտնվելու առաջին իսկ շաբաթվա ընթացքում վրացական զորքերը սկսեցին բռնի գործողություններ հայերի և ռուսների (ավելի ուշ թալանեցին նաև տեղի վրացիներին) նկատմամբ²:

Տեղի հայերը պատրաստվեցին դիմադրության: Սեպտեմբերի սկզբներին վրացիները և հայերը հայտնվեցին զինված հակամարտության եզրին: Լարված հարաբերությունների սկիզբը դարձավ քաղաքում գործող վրաց գվարդիականների կողմից Գագրայի «Մաշտոց» համայնքի ղեկավար Արսեն Չաքրյանին թալանելը: Երբ համայնքի ներկայացուցիչները փորձեցին այդ հարցը լուծել խաղաղ ճանապարհով և դիմեցին Գագրայի վարչակազմին, նրանց ձերբակալեցին և հանձնեցին իրավապահ մարմիններին: Միայն Գագրայի ղեկավար Միխայիլ Ջինչարաձեի անձնական միջամտությունը հայերին փրկեց մահից: Վախենալով հաշվեհարդարից՝ «Մաշտոց»-ի ղեկավար Արսեն Չաքրյանը

¹ Նույն տեղում:

² Նույն տեղում:

հեռացավ քաղաքից՝ հրաժարվելով հայ համայնքի ղեկավարի պաշտոնից: Նրան փոխարինեց հայկական դպրոցի նախկին ուսուցիչ Խաչիկ Մինասյանը¹: Համայնքի նոր ղեկավարը կարողացավ խուսափել հակամարտությունից՝ հասկանալով, որ անգե՛ն մարդիկ չեն կարող դիմադրել լավ զինված վրաց գրոհայիններին, որոնց աջակցում էր տեղի վրացիների մեծ մասը: Միակը, ինչին գնաց համայնքը, հնչեցված խիստ հրամանի կատարումն էր՝ ոչ մի դեպքում չմասնակցել ռազմական գործողություններին վրացական կողմում:

Հայ համայնքի խնդիրները դրանով չավարտվեցին: Տեսնելով իրենց լիակատար անպատճեղիությունը՝ վրաց գրոհայինները սկսեցին առավել հաճախ հարձակվել հայկական տների վրա՝ հարկադրելով մարդկանց փախչել քաղաքից՝ թողնելով իրենց տունն ու ունեցվածքը:

Նոր հակամարտությունը հայերի և վրացիների միջև երկար սպասել չտվեց: Վրաց զինվորականներն անցկացրին առաջին ծրագրված զանգվածային հակահայկական գործողությունը: 1992թ. սեպտեմբերի կեսերին Գագրայի մերձակա Կոլխիդա գյուղի հայկական մաս մտավ վրացական ուժերի զրահատեխնիկան: Մարտական մեքենաները շրջափակեցին գյուղի կենտրոնական փողոցը երկու կողմից, իսկ զինվորականները սկսեցին մտնել տները և մարդկանց զգուշացնել, որպեսզի վերջիններս անմիջապես հավաքվեն և հեռանան գյուղից: Դրա հետ մեկտեղ մարդկանց արգելում էին իրենց հետ վերցնել ունեցվածքը: Վրաց զինվորականներն իրենց գործողությունները բացատրում էին նրանով, որ արխագները պատրաստվում են հրետանային կրակ բացել գյուղի ուղղությամբ, և անհրաժեշտ է շտապ տեղափոխություն: Վախից սարսափահար մարդիկ վերցնում էին առաջին անհրաժեշտության իրերը և փախչում գյուղից: Գյուղում մնացին միայն հայկական համայնքի դիտորդները, որոնք սարսափով հաղորդում էին այն մասին, որ վրաց զինվորականները կողոպտում են լքված տները: Երկու օր անց գյուղի ուղղությամբ կրակ բացեց ծանր հրետանին: Կողոպտված գյուղն ամբողջությամբ հրկիզվեց, տուժեց նաև գյուղի վրացական մասը: Ի պատասխան՝ հուզումներ սկսվեցին Գագրայի շրջանի հայերի մեջ: Վրացական կողմը հարկադրված էր ճակատից բանակային մասեր տեղափոխել և տեղավորել քաղաքում, որպեսզի հայերի բացահայտ ելույթի դեպքում ուժով ճնշի այն²: Օրեր շարունակ տեղի էին ունենում հայ համայնքի ղեկավարության անդադար նիստեր, խորհրդակցություններ վրաց առավել հեղինակավոր քաղաքական գործիչների հետ: Գագրայի շրջանը գտնվում էր հայ-վրացական բախման եզրին, ինչի արդյունքում 1992թ. սեպտեմբերին սկսվեց Աբխազիայից հայերի զանգվածային հոսք դեպի Ռուսաստան:

¹ Նույն տեղում:

² Նույն տեղում:

Լարված էր իրավիճակը նաև Արևելյան Աբխազիայում: Գրեթե դատարկվեցին Օչամչիրայի և Գուլրիպշսկի շրջանների հայկական գյուղերը, որոնցում ծավալվել էին մարտական գործողություններ: Աբխազիայի մայրաքաղաքում վրաց գրոհայիններն իսկական որս սանձազերծեցին Սուխումի «Կռունկ» համայնքի ղեկավարների ընտանիքների նկատմամբ: Ձերբակալվեցին բազմաթիվ հայեր, Սուխումի իր բնակարանում սպանվեց «Կռունկ»-ի ղեկավար Ալբերտ Թոփայանի մայրը¹:

Այս ամենը հանգեցրեց նրան, որ հայերը սկսեցին մասնակցել վրաց-աբխազական պատերազմական գործողություններին՝ աջակցելով աբխազական կողմին: Սակայն աբխազահայության մասնակցությունը համակարգված չէր հայկական համայնքի ղեկավարների կողմից և նման էր առանձին մարդկանց ինքնակոչ ելույթների, որոնց մասնակիցները կոչ էին անում աջակցել աբխազներին: Հարկ է նշել, որ վրացական կողմն արդեն հայերին բացահայտ մեղադրում էր նրանում, որ վերջիններս հրաժարվում են աջակցել Վրաստանի տարածքային ամբողջականության համար մղվող պայքարին:

1992թ. հոկտեմբերի 2-ին աբխազական աշխարհագորայինները և Կովկասի լեռնային ժողովուրդների համադաշնության (ԿԼԺՀ) կամավորական ջոկատները մտան Գագրա, և քաղաքի փողոցներում սկսվեցին դաժան մարտեր վրացական զորքերի հետ: Անհրաժեշտ է նշել, որ թեև աբխազական ուժերը հարձակման էին անցնում քաղաքի գերազանցապես հայերով բնակեցված շրջանների միջով, սակայն մարտերի ամբողջ ընթացքում քաղաքում չարձանագրվեցին աբխազական ուժերի կողմից դաժանության և այլ անօրինական գործողությունների փաստեր հայ բնակչության հանդեպ: Անկասկած, դա դրական ազդեցություն գործեց աբխազական կողմի նկատմամբ հայության վերաբերմունքի ձևավորման հարցում: Արդյունքում՝ հայ բնակչությունն օգնում էր աբխազական աշխարհագորայիններին և ԿԼԺՀ-ի կամավորականներին Գանթիադիի մատույցներում:

1992թ. հոկտեմբերին աբխազահայերի ամենագործուն և լուրջ աջակցության շնորհիվ Գագրայի շրջանն անցավ աբխազական իշխանությունների վերահսկողության ներքո, ինչից հետո «Մաշտոց» համայնքը վերսկսեց գործունեությունը: Խմբակցության քաղաքականությունը, ինչպես և նախկինում, լիակատար չեզոքության պահպանումն էր:

Սուխումի ազատագրման համար մղվող 1993թ. հունվարյան առաջին ռազմական գործողություններին աբխազական ուժերի կողմից մարտնչում էին հայ համայնքի գրեթե 100 ներկայացուցիչներ: Նրանք հիմնականում Պիցունդա գումարտակի զինվորներն էին, Գուդաուտիի շրջանի բնակիչները: Սա-

¹ Նույն տեղում:

կայն հայերը մարտական գործողություններին զանգվածային մասնակցություն դեռ չէին ցուցաբերում:

Այդ ժամանակ Արխագիային աջակցելու նպատակով երկիր ժամանեցին չեչենական գրոհայինների ջոկատներ, որոնք մասնակցել էին Լեռնային Ղարաբաղի պատերազմին Ադրբեջանի կողմից: 1993թ. ձմռանն առաջին անգամ հայ բնակչությունը բախվեց չեչենական կամավորականների կողմից իր հասցեին հնչած սպառնալիքներին: 1993թ. ձմռանը հայերի և չեչենների միջև տեղի ունեցավ երկու բախում, որի արդյունքում սպանվեց 2 հայ: Արխագիայի առաջնորդ Վլադիսլավ Արձինբայի անմիջական մասնակցությամբ հարթվեց հայ-չեչենական լարվածությունը և վերջ տրվեց բախումներին¹: Բացի այդ, տեղային բախումներն արխագական ուժերի թիկունքում չվերածվեցին լայնամասշտաբ մարտական գործողությունների հայկական համայնքի ներկայացուցիչների և Արխագիայի կառավարության ակտիվ գործողությունների շնորհիվ:

Միևնույն ժամանակ, վրաց-արխագական ռազմական գործողությունների վայրերից շարունակվում էր խաղաղ բնակիչների զանգվածային արտագաղթը, որոնք վրաց զինվորների կողմից ենթարկվում էին կողոպուտի և բռնությունների: Վրացական ռազմական վարչակազմն իր կողմից քայլեր էր ձեռնարկում Վրաստանի հայ բնակչությանը մարտական գործողությունների մեջ ներքաշելու ուղղությամբ: Այդ նպատակին հասնելու համար մշակվեց մի համալիր ծրագիր, որի առաջին քայլը եղավ Արևելյան Վրաստանի (հիմնականում Բորժոմի, Քութայիսիի և Թբիլիսիի) հայ բնակչության մոբիլիզացումը: Հայերին ներառում էին այն զորամասերի կազմում, որոնք ուղևորվում էին արխագական ճակատ: Ուղարկելուց առաջ հայերի նկատմամբ տանում էին համապատասխան գաղափարական աշխատանք: Մասնավորապես հաղորդվում էր, որ «մահմեդական արխագները հյուսիսային կովկասցիների հետ համատեղ, կազմակերպում և իրականացնում են հայերի երկրորդ ցեղասպանությունն Արխագիայում, և անհրաժեշտ է շտապ օգնություն ցուցաբերել եղբայրներին»²: Մակայն «քրիստոնյա եղբայրներին փրկելու համար» մոբիլիզացվեց ընդամենը մի քանի տասնյակ հայ: Այսպիսով, հայկական համայնքին վրացական կողմից պատերազմի մեջ ներքաշելու Վրաստանի առաջին փորձը ձախողվեց: Այդ իրավիճակում վրացական իշխանությունները հորինեցին նոր առասպել այն մասին, որ «Արխագիայի հայերը, ըստ էության, թուրքեր են և այդ պատճառով էլ աջակցում են արխագներին»:

Արխագիայի՝ վրացական կողմից վերահսկվող տարածքներում իրավիճակն առավել բարդ էր, հայ բնակչությունը նախկինի պես հրաժարվում էր գենք վերցնել: Վրացական վարչակարգը Մուխոմում սկսեց ստեղծել «ինքնա-

¹ Նույն տեղում:

² Նույն տեղում:

պաշտպանական» ջոկատներ, որոնց խնդիրն էր պաշտպանել քաղաքի փողոցները՝ բացահայտորեն գործող վրաց կողոպտիչներից: Ստեղծված «ինքնապաշտպանական» ջոկատները չէին կարող կասեցնել հանցավորության ալիքը, քանի որ այդ ջոկատները ստեղծվել էին այլ նպատակով: Դրանց ստեղծման հիմնական նպատակն էր ստեղծել այնպիսի պայմաններ, որպեսզի ոչ վրացի բնակչությունը, խուսափելով աբխազների վրեժից, ակտիվորեն մասնակցի «Վրաստանի տարածքային ամբողջականության համար» մղվող պատերազմին: Վրացական ռազմական վարչակարգի այդ քայլն արդյունքում ճակատագրական դեր խաղաց:

1993թ. փետրվարի վերջին և մարտի սկզբին տեղի ունեցավ իրադարձությունների շղթա, որոնք վճռական դերակատարություն ունեցան վրաց-աբխազական հակամարտությունում աբխազահայերի դիրքորոշման վրա: Բանն այն է, որ վրացական բանակը մի շարք հարձակումներ իրականացրեց Աբխազիայի Սուխումի, Գուլրիպշի, Օչամչիրայի շրջանների հայկական գյուղերի դեմ և դաժան հաշվեհարդար տեսավ հայ բնակիչների նկատմամբ, որոնք բնորոշվում էին որպես ցեղասպանություն:

Վրացիների կողմից Աբխազիայի հայ բնակչության ցեղասպանության մասին լուրն Աբխազիայի հայ համայնքի շրջանում զայրույթ առաջացրեց: Գագրայի «Մաշտոց» համայնքի ղեկավարության շտապ հրավիրած հավաքում որոշվեց աջակցել աբխազական կողմին և զենքը ձեռքերին հանդես գալ վրացական զորքի դեմ: Հավաքում նաև հայտարարվեց հայկական ստորաբաժանման ձևավորման մասին¹: Այսպիսով, վրացիների վայրագությունները հարկադրեցին հայերին իրականացնել պաշտպանական միջոցառումներ և ավելի ակտիվ մասնակցություն ունենալ հակամարտությանը:

Շտապ գումար հավաքվեց հայկական գումարտակի ձևավորման համար: Հարկ է նշել, որ Աբխազիայի «Մաշտոց» համայնքի ներկայացուցիչները շրջայց են կատարել Ռուսաստանի բոլոր հայ համայնքներով, հանդիպել ազդեցիկ և հայտնի հայ մարդկանց հետ: 1993թ. կեսերին «Մաշտոց» հայկական համայնքը զինամթերք ձեռք բերեց: Այդ ժամանակ արդեն խումբ էր ձևավորվել Գագրայի հայերից (մոտ 100 մարդ):

Աբխազիայի առաջնորդ Վլադիսլավ Արձինբայի 1993թ. փետրվարի 3-ի հրամանով ստեղծվեց Հովհաննես Բաղրամյանի անվան հայկական մոտոհրաձգային գումարտակը (հայկական գումարտակում կար մոտ 300 մարտիկ), որն էլ 1993թ. մարտի 15-ին կազմակերպված ձևով մուտք գործեց Աբխազիայի զինված ուժերի շարքերը²:

¹ Լույն տեղում:

² Армянский вопрос" в Абхазии глазами грузинских СМИ, <http://www.regnum.ru/news/772350.html>.

Հայկական գումարտակը համալրվեց նաև Լեռնային Ղարաբաղում մարտնչած արխազահայ մարտիկներով՝ գումարտակում զինվորների թիվը հասցնելով 350-ի: Բացի այդ, արխազահայության անմիջական մասնակցությամբ Գագրայում կազմակերպվեց երկրորդ հայկական գումարտակը: Վրաց-արխազական պատերազմում Աբխազիայի զինված ուժերի շարքերում կռված արխազահայերի թիվը, տարբեր տվյալներով, կազմել է ավելի քան 1500 մարդ:

Աբխազական ուժերի կողմից վերահսկվող տարածքներում շարունակվում էր նաև ակտիվ ներքաղաքական կյանքը: Այդ ժամանակահատվածում Սուխումի «Կռունկ» հայկական համայնքի ներկայացուցիչներն Աբխազիայի իշխանությունների ազդեցության ներքո փորձեցին հերթական անգամ իրենց ամբողջական հսկողության տակ առնել հայկական գումարտակները: Ալբերտ Թոփայանը կտրուկ հարց բարձրացրեց «Մաշտոց» և «Կռունկ» համայնքներն իր ղեկավարությամբ մեկ ընկերակցության մեջ միավորելու վերաբերյալ: Ներքաղաքական այս իրավիճակը բերեց Աբխազիայի հայ համայնքի պառակտման: Մասնավորապես, Ալբերտ Թոփայանի ճնշման ներքո Վաղարշը՝ գանձիադան գումարտակի հրամանատարը, հայտարարեց, որ իր ստորաբաժանումը ենթարկվում է Սուխումի «Կռունկ» համայնքին: Միննույն ժամանակ, Կիվորը՝ Գագրայի գումարտակի հրամանատարը, կտրականապես հրաժարվեց միավորվելուց¹:

Իրավիճակն էլ ավելի բարդացրեց Գուդաուտայում տեղի ունեցած պատահարը: Աբխազական զինվորի կողմից կռվի ժամանակ սպանվեց Ալբերտ Թոփայանի թիկնապահը: Չցանկանալով այդ կոնֆլիկտին էթնիկ երանգավորում տալ՝ «Կռունկի» ղեկավարը փորձեց կանխել խնդրի բարդացումը: Սակայն պատահարի մասին լուրը շտապ հասավ Գագրա: Միջադեպը բավական սրեց տեղացի հայերի և արխազների հարաբերությունները՝ սպառնալով վերածվել լայնածավալ բախման: Կոնֆլիկտի թեժ պահին «Մաշտոց»-ի ղեկավարների պատվիրակությանն ընդունեց Աբխազիայի առաջնորդ Վլադիսլավ Արձիբյան: Խոսակցության արդյունքում կոնֆլիկտը հարթվեց²:

Հարկ է նշել, որ վերոնշյալ միջադեպի հանգուցալուծումից հետո բարելավվեցին հայերի և արխազների հարաբերությունները: 1993թ. սեպտեմբերին արխազական կողմը սկսեց վրացական ուժերի դուրսմղման գործողություններն Աբխազիայի տարածքից: Այդ գործողություններին ակտիվ մասնակցություն էին ցուցաբերում հայկական գումարտակները, որոնք, ականատեսների վկայությամբ, լավ զինված և համալրված էին:

Աբխազիայի մայրաքաղաքի ազատագրումից անմիջապես հետո հայկական գումարտակն ուղարկվեց Կոդորի կիրճ: Գումարտակի խնդիրը Լատա գյուղի և թունելների մոտ գտնվող վրացական հզոր պաշտպանական շրջանի

¹ Амшенци Лаврентий, АРМЯНСКИЙ АКЦЕНТ ГРУЗИНО-АБХАЗСКОГО КОНФЛИКТА, ноябрь 2002, <http://www.abkhazia.narod.ru/lavrik-nov.htm>.

² Նույն տեղում:

ոչնչացումն էր: Եռօրյա թեժ մարտերից հետո պաշտպանական շրջանում գտնվող սվանները ջախջախվեցին և փախան Կողորի կիրճի լեռնաշղթայից այն կողմ: Մարտերի ակտիվ փուլի ավարտից հետո, երբ Աբխազիան արդեն լիովին ազատագրվել էր, նորից սրվեցին հարաբերությունները «Կռունկի» և «Մաշտոցի» միջև: Մոտիկ կանգնած լինելով իշխանություններին՝ «Կռունկ»-ին հաջողվեց իրականացնել համայնքների միավորման խնդիրն Ալբերտ Թոփալյանի ղեկավարությամբ, որը բարձր պաշտոն զբաղեցրեց Աբխազիայի կառավարությունում և գլխավորեց միավորված համայնքը¹:

Պատերազմի ավարտից հետո Աբխազիայի հայ համայնքը կազմալուծեց երկու հայկական գումարտակները և սկսեց ակտիվորեն զբաղվել Արևելյան Աբխազիայի հայ բնակչության խնդիրներով: Սակայն, չնայած նախաձեռնված անվտանգության միջոցառումներին, 2001թ. հոկտեմբերին չեչեն հրամանատար Ռուսլան Գիլանի և Կողորի կիրճում Վրաստանի նախագահի ներկայացուցիչ Էմգար Կվիցիանիի հանցագործ խմբավորումները ներխուժեցին Նաս և Գեորգիևսկ հայկական գյուղերը: Սպանվեց մոտ 14 հայ: Առաջինն այդ խմբավորումների դեմ դուրս եկան Աբխազիայի պաշտպանության նախարարության մարտիկները և Ցեբելդա հայկական գյուղի բնակիչները, որը գտնվում էր Կողոր գետի ներքին հոսանքի շրջանում²: Արդյունքում՝ նրանց հաջողվեց հետ շարժել հակառակորդին և նախարարությանը ժամանակ տալ այդ շրջան տեղափոխել ռազմական տեխնիկա և զինվորական ստորաբաժանումներ:

Հարկ է նշել, որ վրաց-աբխազական պատերազմում հայերն ակտիվորեն մասնակցել են ոչ միայն «Բաղրամյանի գումարտակում», այլև աբխազական գումարտակներում ևս: Մասնավորապես, հայերը լուրջ մասնակցություն են ունեցել առաջին հրաձգային, երկրորդ մոտոհրաձգային, Գանթիադիի, Սուխումի, Էշերա-Աֆոնի, Գագրայի «Ասափշ» վաշտերում [3]: Ռազմական գործողություններին մասնակցել է 1500-ից ավելի հայ: Նրանցից 140-ը զոհվել է, ռազմական ծառայությունների համար 11 հայի շնորհվել է Աբխազիայի հերոսի կոչում (Կ.Գուրգենյան, Գ.Տրապիզոնյան, Ա.Ասխանյան, Շ.Կիրակոսյան, Ա.Ասատրյան և ուրիշներ), 5-ը պարգևատրվել են «Լեոնի» շքանշանով, իսկ 10-ը՝ «Քաջության համար» մեդալներով: Հայկական գումարտակը մասնակցել է նաև 1998թ. մայիսին Գալիի շրջանում վրացիների դեմ իրականացված պատժիչ գործողություններին [3]:

Հարկ է նշել, որ չնայած Աբխազիայի հայ համայնքը լուրջ դերակատարություն է ունեցել վրաց-աբխազական հակամարտությունում, ներկայումս Աբխազիայում հայերի վիճակը բավական անմխիթար է, և մի շարք բնակա-

¹ Նույն տեղում:

² Նույն տեղում:

վայրերում հայերն իրենց ճնշված և վախեցած են զգում: Վերջին տարիներին արխագահայության շրջանում նկատվում են արտագաղթի ահագնացող տեմպեր: Դա, ինչ խոսք, լուրջ սպառնալիք է Աբխազիայի հայ համայնքի համար:

Թեև հայերն Աբխազիայում թվաքանակով պաշտոնական վիճակագրությամբ գրավում են 2-րդ տեղն արխագներից հետո, սակայն հայերի իշխանությունը երկրում, իրենց թվի համեմատ, սահմանափակ է: Ի տարբերություն խորհրդային տարիների, երբ Աբխազիայում հայերը զբաղեցրել են բավական բարձր պաշտոններ (մասնավորապես, նախարարների խորհրդի նախագահի տեղակալը հայ է եղել), ներկայումս հայերի զբաղեցրած ամենաբարձր պաշտոնն Աբխազիայի խորհրդարանի փոխխոսնակի պաշտոնն է: Իսկ ընդհանուր առմամբ հայերը կառավարական մարմիններում ներկայացված են փոխնախարարների և շրջանային ղեկավարների տեղակալների մակարդակով: 2007թ. մարտի 4-ին Աբխազիայում անցկացված խորհրդարանական ընտրությունների արդյունքում Աբխազիայի չորրորդ գումարման խորհրդարանի 35 պատգամավորներից 3-ը ընտրվեցին հայեր՝ Վալերի Մայրոմյանը, Սերգեյ Մաթոսյանը և Ալբերտ Հովսեփյանը (վերջինս նաև խորհրդարանի փոխխոսնակն է)¹:

Ամփոփելով՝ կարող ենք եզրակացնել, որ Աբխազիայի հայ համայնքը լուրջ դերակատարություն է ունեցել վրաց-արխագական հակամարտությունում, թեև հակամարտության սկզբնական շրջանում արխագահայերի մեծ մասը ձգտում էր չեզոքության: Սակայն վրացական ազգայնականների և զորքի ընդգծված հակահայկական քայլերը, վայրագություններն ու թալանը հարկադրեցին արխագահայերին անցնել արխագների կողմը՝ միննույն ժամանակ պաշտպանելով սեփական ժողովրդին, նրանց կյանքը և ունեցվածքը:

Հունիս, 2011թ.

Աղբյուրներ և գրականություն

1. *Рафаэл Абрамян*, Армянский некрополь Абхазии, «Генеалогия Северного Кавказа», № 2, 2002.
2. Абхазия сегодня, Доклад Крайсис Групп N176 Европа, 15 сентября 2006.
3. *Թեևուր Մժավիա*, «Կռունկի» հիմնադրումը տեղի ունեցավ «Դաշնակցության» ակտիվ օժանդակությամբ, «Ջորջիան թայմս», 05.10. 2007:

¹ Աբխազիայի խորհրդարանում կլինի 3 հայ պատգամավոր, <http://www.panorama.am/am/society/2007/03/06/abxazia/?sw>.

ГРУЗИНО-АБХАЗСКИЙ КОНФЛИКТ И АРМЯНСКИЙ ФАКТОР

Григор Аршакян, Арман Егиазарян

Резюме

В статье рассматривается фактор армянской общины Абхазии в грузино-абхазской войне. Дается краткий исторический обзор становления армянской общины Абхазии, ее деятельности, а также внутриобщинных противоречий. Внимание уделяется демографическому облику армянской общины Абхазии в советский и постсоветский периоды.

При рассмотрении активности армянства Абхазии дается сравнительный анализ деятельности армянской общины Сухума и Гагры, выявляются их возможности и степень влияния на внутри- и внешнеполитическую жизнь Абхазии.

Детально анализируются причины и предпосылки вовлечения армянства Абхазии в грузино-абхазский конфликт, освещаются позиции и подходы разных частей армянской общины Абхазии к грузино-абхазскому конфликту, а также действия грузинской армии против армянского населения Абхазии.